



Broj: 03/1-50-14-7-2/20

Sarajevo, 18. 2. 2020.



PRIMLJENO:			
Organizaciona jedinica	Klasifikaciona oznaka	Redni broj	Broj priloga
		19-02-2020	

ZAPISNIK

2. sjednice Zajedničke komisije za odbranu i sigurnost BiH,

održane 5. 2. 2020, od 11.00 do 12.45 sati

Sjednicu Zajedničke komisije za odbranu i sigurnost BiH (u daljnjem tekstu: Zajednička komisija) sazvaio je predsjedavajući Zajedničke komisije Asim Sarajlić.

Sjednici su prisustvovali svi članovi Zajedničke komisije: Asim Sarajlić, Borjana Krišto, Dušanka Majkić, Sanja Vulić, Dženan Đonlagić, Dragan Mektić, Šemsudin Mehmedović, Sredoje Nović, Marina Pendeš, Amir Fazlić, Zukan Helez i Bariša Čolak.

Sjednici su prisustvovali i gosti, kao i predstavnici službi Parlamentarne skupštine BiH:

- Enes Obralića, zamjenik predsjednika Nezavisnog odbora PSBiH
- Ljubomir Kuravica, član Nezavisnog odbora PSBiH
- Mate Miletić, član Nezavisnog odbora PSBiH
- Bakir Dautbašić, prvi zamjenik predsjednika, Odbor za žalbe građana na rad policijskih službenika u policijskim tijelima BiH,
- Boško Šiljegović, parlamentarni vojni povjerenik BiH
- Ivana Lovrić, stručna savjetnica u Sektoru za druga parlamentarna tijela Sekretarijata PSBiH
- Niko Duvnjak, savjetnik zamjenice predsjedavajućeg Predstavničkog doma PSBiH
- Enver Bogučanin, stručni savjetnik iz Sektora za odnose s javnošću Sekretarijata PSBiH
- Bojan Komšić, stručni saradnik u Uredu parlamentarnog vojnog povjerenika BiH
- Damir Karahodžić, šef odsjeka u Ministarstvu vanjske trgovine i ekonomskih odnosa BiH
- Ljiljana Milićević, sekretarka, i Željko Grubešić, stručni savjetnik u Zajedničkoj komisiji,
- Amel Fako, savjetnik za politička i vojna pitanja u Ambasadi SAD-a
- Salman Khan, savjetnik za politička i vojna pitanja u Ambasadi SAD-a
- Christian Haupt, savjetnik za izgradnju sigurnosnih institucija, Štab NATO-a u Sarajevu
- Željka Domazet, novinarka "Glasa Srpske".

Asim Sarajlić je na početku sjednice pozdravio prisutne u svojstvu predsjedavajućeg Zajedničke komisije. Reкао je da će nastojati, zajedno sa svim članovima, da i u ovom mandatu Zajednička komisija, u skladu sa svojim nadležnostima, bude prepoznatljiva u svom radu. Cilj je da se učini sve što treba i može kako bi se sigurnosno okruženje poboljšalo i adekvatno se odgovorilo na aktuelne sigurnosne izazove.

Ukazaо je na trenutnu situaciju u kojoj se od svih radnih tijela Parlamentarne skupštine BiH traži da se razmatraju dokumenti i materijali koji su se nagomilali u prethodnom periodu. Najavio je još jednu sjednicu u februaru o čemu će članovi Zajedničke komisije biti blagovremeno obaviješteni. Sve navedeno je i razlog zašto su u Orijentacionom planu od aktivnosti za Zajedničku komisiju u februaru 2020. planirane samo njene sjednice.

Njavio je da je u martu planirana po njemu najvažnija aktivnost, a to je održavanje dvodnevnog Orijentacionog seminara za članove Zajedničke komisije, zajedno s čelnim ljudima Ministarstva odbrane BiH i Ministarstva sigurnosti BiH, kao i policijskih agencija i drugih institucija iz nadležnosti Zajedničke komisije. To će biti prilika da svi čelni ljudi iz resora odbrane i sigurnosti izvještajno informiraju članove ZK o aktuelnom stanju i problemima u svojim institucijama, kao i o svojim planovima. Zajedničkoj komisiji je to prilika da sagleda gdje je stanje urgentno, te da se nakon toga krene u obilaskе prioritетnih institucija s ciljem da se traže rješenja za popravljаnje situacije. To će ujedno biti prilika za one koji nisu bili ranije u Zajedničkoj komisiji da se upoznaju sa svim institucijama i njihovim nadležnostima. Planirano je da ova aktivnost bude realizirana u zgradi Parlamentarne skupštine BiH i trebala bi biti dvodnevna.

Asim Sarajlić je nakon uvodnog obraćanja upoznao prisutne članove Zajedničke komisije s dnevnim redom.

Komisija se izjasnila o dnevnom redu 2. sjednice koji je predložio predsjedavajući Komisije Asim Sarajlić, te je jednoglasno, sa 12 glasova „za“, usvojen sljedeći

DNEVNI RED

- 1. Usvajanje Zapisnika konstituirajuće sjednice Zajedničke komisije za odbranu i sigurnost BiH;**
- 2. Usvajanje Izvještaja o radu Zajedničke komisije za odbranu i sigurnost BiH za 2018. godinu (materijal Zajedničke komisije za odbranu i sigurnost BiH);**
- 3. Razmatranje i usvajanje Orijentacionog radnog plana Zajedničke komisije za odbranu i sigurnost BiH za 2020. godinu (materijal Zajedničke komisije za odbranu i sigurnost BiH);**
- 4. Razmatranje inicijative Predraga Kojovića, poslanika u PDPSBiH, kojom se VMBiH obavezuje da uradi analizu propusnosti državne granice BiH i opremljenosti Granične policije za bolju kontrolu državne granice (akt broj: 01-50-1-1519/19 od 23. 8. 2019);**

5. Razmatranje Izvještaja o izdatim ispravama i odbijenim zahtjevima za izdavanje isprava za vanjskotrgovinski promet oružja, vojne opreme i robe posebne namjene za 2017. i Izvještaja o realizaciji izdatih isprava za vanjskotrgovinski promet oružja, vojne opreme i robe posebne namjene za 2017. (obrađivač: MVTEO BiH, broj: 01,02-50-18-1623/19 od 12. 9. 2019);

6. Razmatranje Izvještaja o radu parlamentarnog vojnog povjerenika BiH za 2018. godinu (akt broj: 05/3-37-6-227/19 od 28. 1. 2019);

7. Razmatranje Izvještaja o radu Odbora za žalbe građana PSBiH za 2018. godinu (akt broj: 05/2-50-12-237/19 od 29. 1. 2019);

8. Razmatranje Izvještaja o radu za 2018. godinu (akt broj: 05/1-50-13-26-55-9/19 od 21. 1. 2019) i Plana rada Nezavisnog odbora PSBiH kao nezavisnog tijela policijske strukture BiH za 2019. godinu (akt broj: 05/1-50-13-26-54-9/18 od 21. 1. 2019);

9. Tekuća pitanja.

Ad.1. Usvajanje Zapisnika konstituirajuće sjednice Zajedničke komisije za odbranu i sigurnost BiH

Kako o Prijedlogu zapisnika nije bilo rasprave, članovi Zajedničke komisije izjasnili su se o Zapisniku konstituirajuće sjednice Zajedničke komisije za odbranu i sigurnost BiH.

Zajednička komisija je jednoglasno, s 12 glasova „za“, usvojila Zapisnik konstituirajuće sjednice.

Ad.2. Usvajanje Izvještaja o radu Zajedničke komisije za odbranu i sigurnost BiH za 2018. godinu (materijal Zajedničke komisije za odbranu i sigurnost BiH)

Asim Sarajlić naglasio je da su članovi Zajedničke komisije ovog saziva u prilici da se izjasne o Izvještaju o radu Zajedničke komisije za 2018. godinu. To je situacija koja se ponavlja svake godine nakon izbora kada novi saziv ne razmatra izvještaj o radu Zajedničke komisije iz prethodnog saziva. U skladu s odredbama poslovnika oba doma PSBiH, sačinjen je Izvještaj o radu Zajedničke komisije za odbranu i sigurnost BiH za 2018. godinu, i on sadrži potpuni pregled aktivnosti predstavnika Zajedničke komisije tokom 2018. godine, sa posebnim osvrtom na:

- prisustvo članova sjednicama Zajedničke komisije,
- pregled održanih sjednica s realiziranim tačkama dnevnog reda,
- zakonodavne aktivnosti i aktivnosti vezane za razmatranje i usvajanje ostalih akata,
- prisustvo radionicama, okruglim stolovima, seminarima i konferencijama u BiH,

- prisustvo studijskim posjetama i programima profesionalnog usavršavanja u inozemstvu,
- bilateralne posjete Zajedničke komisije inozemstvu,
- saradnju s predstavnicima institucija vlasti BiH,
- saradnja s predstavnicima međunarodnih organizacija u BiH,
- posjete stranih delegacija i predstavnika diplomatsko - konzularnih predstavništava Zajedničkoj komisiji za odbranu i sigurnost, te
- terenske posjete članova Zajedničke komisije.

Podsjetio je na to da Zajednička komisija usvaja predmetni izvještaj, te ga u skladu s članom 56. Poslovnika Predstavničkog doma i članom 46. Poslovnika Doma naroda Parlamentarne skupštine BiH dostavlja domovima PSBiH na daljnje postupanje.

Dušanka Majkić naglasila je da je novih 80% članova Zajedničke komisije te da je obim rada veliki i značajan i traži puni angažman u svakom segmentu. Podsjetila je nove članove da ova komisija nadzire Ministarstvo odbrane BiH i OSBiH, Ministarstvo sigurnosti BiH i sedam policijskih agencija koje se nalaze u njegovom sastavu kao samostalne upravne organizacije. Treću grupu, koju nadzire ZK, čine Ministarstvo vanjske trgovine i ekonomskih odnosa BiH u dijelu koji se odnosi na uvoz/izvoz naoružanja i vojne opreme, Ministarstvo civilnih poslova BiH u dijelu koji se odnosi na deminiranje te četvrti dio koji se odnosi na Odbor za žalbe građana PSBiH, Nezavisni odbor PSBiH i parlamentarnog vojnog povjerenika BiH. Radi se o tijelima koje je formirala PSBiH.

Naglasila je da Zajednička komisija nadzire utrošak više od 50% budžeta BiH što traži efikasan parlamentarni nadzor. U mandatu koji je iza nas veoma malo se raspravljalo o zakonima, a kada se išlo na teren nije bilo dovoljno članova Komisije. Dušanka Majkić smatra da sadašnji saziv ima dobre uslove za uspješan početak, ali da treba razmisliti o izradi poslovnika o radu, te da se sjednicama treba pristupati s puno odgovornosti i s puno znanja iz ove veoma osjetljive oblasti.

Dragan Mektić naglasio je da se ne slaže s diskusijom kolegice Majkić jer njeno izlaganje smatra držanjem predavanja članovima Zajedničke komisije. Uvjeren je da je svaki član Zajedničke komisije sagledao obim rada i nadležnosti, te smatra da njeno izlaganje nema veze sa predmetnim izvještajem. Smatra da je besmisleno raspravljati o Izvještaju o radu Zajedničke komisije za 2018. godinu.

Asim Sarajlić istakao je da je izlaganje Dušanke Majkić doživio kao vrlo dobronamjerno sa elementima koji su iskustveni i veoma značajni za buduću rad. U pogledu opravdanosti razmatranja ovog izvještaja, istakao je da nema potrebe da se pravi vakuum jer parlamentarna tijela moraju raditi i imati i poštovati kontinuitet.

Dušanka Majkić izrazila je želju da se članovi Zajedničke komisije međusobno uvažavaju te da uprkos činjenici što se nije radilo u 2019. godini smatra da ima prostora da se osvrnu i na 2019. godinu zbog događanja koja su sa sobom nosila značajne sigurnosne izazove.

Dragan Mektić ponovio je da je iskustvo u radu jako bitno, ali i edukacija u skladu s vremenom u kome živimo. Smatra da ga pojedine kolege nisu dobro shvatile.

Marina Pendeš naglasila je da je Izvještaj o radu Zajedničke komisije za 2018. dobra osnova za rad i aktivnosti u 2020. godini te je pojasnila na koji način bi trebalo razmatrati dokumente koje Zajedničkoj komisiji upućuju institucije nad kojim ima parlamentarni nadzor.

Zukan Helez postavio je hipotetsko pitanje o tome šta bi se postiglo da razmatramo ili ne razmatramo ovaj izvještaj o radu za 2018. godine.

Šemsudin Mehmedović konstatirao je da je Zajednička komisija tokom 2018. godine, uprkos opstrukcijama kojih je bilo, radila dobro i uspješno.

Dženan Đonlagić naglasio je da je očekivao da Izvještaj o radu za 2018. godinu sadrži preporuke za buduće aktivnosti i otklanjanje propusta i način rješavanja aktuelnih problema. Ako to dokument iz 2018. ne sadrži, trebamo se potruditi da to bude za izvještaj o radu u 2020. godini. Trebamo unaprijediti procese, strukturu i izvještaj time učiniti dodatno upotrebljivim.

Borjana Krišto naglasila je da trebamo razvijati dobru atmosferu u radu gdje svako ima pravo na svoj stav. S obzirom na razvijenu i prihvaćenu metodologiju u radu svi članovi Zajedničke komisije imat će priliku da predlažu i učestvuju u radu. Izvještaj iz 2018. je dobro podsjećanje i osnova za dobar rad ubuduće.

Zajednička komisija je, s devet glasova „za“, jednim glasom „protiv“ i dva glasa „suzdržan“, usvojila Izvještaj o radu Zajedničke komisije za odbranu i sigurnost BiH za 2018.

Ad.3. Razmatranje Orijentacionog radnog plana Zajedničke komisije za odbranu i sigurnost BiH za 2020. godinu (materijal Zajedničke komisije za odbranu i sigurnost BiH)

Asim Sarajlić podsjetio je prisutne na to da je u skladu s odredbama poslovnika oba doma PSBiH Zajednička komisija sačinila Orijentacioni radni plan za 2020. godinu (u daljnjem tekstu: Plan rada) te da je to materijal koji je u formi prijedloga i koji je modificiran s obzirom na to da se kasnilo s kontituiranjem Zajedničke komisije. Mišljenja je da je Plan rada urađen uz poštovanje specifičnih nadležnosti Zajedničke komisije u oblasti nadzora sektora odbrane i sigurnosti, da je dosta ambiciozan i prilagođen činjenici da smo novi saziv, da ima kolega koji se prvi put sreću s ovom materijom i da je dobro da se prođu određene obuke i seminari, kako bi svi zajedno i pojedinačno odgovorili zadatku na pravi način. Plan sadrži okvirni planirani mjesečni pregled najznačajnih aktivnosti Zajedničke komisije u 2020. godini. Podsjetio je na to da Zajednička komisija usvaja Plan rada za 2020. godinu, te ga u skladu s članom 65. stav (2) Poslovnika Predstavničkog doma i članom 55. stav (2) Poslovnika Doma naroda Parlamentarne skupštine BiH dostavlja domovima PSBiH na daljnje postupanje.

Dragan Mektić izrazio je čuđenje zašto u Planu rada nema ANP ili Programa reformi kako se već zove. Taj dokument predviđa niz konkretnih radnji i usklađivanja sa standardima NATO-a. Postoji i Akcioni plan, bilo da je pravi ili falsificirani. Zajednička komisija treba tražiti Program reformi i Akcioni plan i to dokument koji je preveden na naš jezik. Zajednička komisija ne bi trebala da se bavi trivijalnim stvarima. Treba se baviti istinom ma kakva ona bila. Predlaže da se Plan rada za 2020. dopuni elementima iz ANP-a, a da se predloženi skine s dnevnog reda.

Marina Pendeš iznijela je mišljenje da je Plan rada za 2020. godinu dobra osnova za rad te da se u svom radu treba bazirati na izvornim nadležnostima. Dobivat ćemo izvještaje o radu, prijedloge te druge dokumente za koje ćemo imati priliku da se izjasnimo, konstatacija je Pendeš.

Dženan Đonlagić konstatirao je da, imajući u vidu dnevni red, članovi Zajedničke komisije trebaju usvojiti Plana rada za 2020. te ga uz rad i redovne aktivnosti dopunjavati. Smatra da ne treba Plan rada dopunjavati na osnovu dokumenata koje dostavljaju poslanici pojedinačno i privatno. Insistira da se korekcije Plana rada mogu raditi temeljem dokumenata koji dolaze iz Predsjedništva BiH, Vijeća ministara BiH te nadležnih institucija. To je zakonska i ustavna obaveza. Ključna adresa za dokumente koji se trebaju razmatrati je Vijeće ministara BiH i oba doma PSBiH, smatra Đonlagić.

Sanja Vulić ukazala je na tehničku (slovnju) grešku na 2. stranici prijedloga te je sugerirala da se tokom oktobra 2020. godine, kada će biti održani lokalni izbori, ne planiraju putovanja i obilasci institucija.

Zukan Helez naglasio je da tematika o kojoj govori Dragan Mektić ima smisla jer je Program reformi ključni dokument koji neće biti tabu tema. Vijeće ministara BiH ima jasne nadležnosti tako da će se Program reformi početi provoditi u momentu kada se Vijeće ministara BiH počne baviti konkretnim aktivnostima iz tog dokumenta. Njegov stav je da bi se praćenje provođenja Programa reformi trebalo naći na svakoj sjednici Zajedničke komisije i tako biti uneseno u Plan rada, kao aktivnost za svaki mjesec.

Dužanka Majkić dala je objašnjenje po kojem je jasno da sve što Vijeće ministara BiH dostavi PSBiH iz sektora odbrane i sigurnosti će po automatizmu biti predmet rasprave na sjednicama Zajedničke komisije.

Ljiljana Milićević pojasnila je na koji način se tretiraju dokumenti i informacije koji dolaze preko domova u Zajedničku komisiju, a kako oni koje institucije direktno naslovljavaju na Zajedničku komisiju. Objasnila je i značaj i način rada na terenu te procedure koje su definirane poslovnica oba doma PSBiH u dijelu koji se odnosi na Zajedničku komisiju, njene nadležnosti i način rada.

Sredoje Nović rekao je da ne može vjerovati na kakve rasprave gubimo vrijeme. Podsjetio je da će Program reformi, koji je usvojen u Predsjedništvu BiH, biti dostavljen nadležnim institucijama pa i PSBiH. Bit ćemo obavezni da razradimo metodologiju provođenja tog dokumenta kao i niza dokumenata koji će tokom godine biti upućeni Zajedničkoj komisiji. Bit ćemo u prilici Orijentacioni plan obogatiti novim poglavljima koja su našoj nadležnosti.

Zajednička komisija je, s 10 glasova „za“ i dva glasa „protiv“, usvojila Orijentacioni radni plan Zajedničke komisije za odbranu i sigurnost BiH za 2020. godinu.

Ad.4. Razmatranje inicijative Predraga Kojovića, poslanika u PDPSBiH, kojom se VMBiH obavezuje da uradi analizu propusnosti državne granice BiH i opremljenosti Granične policije za bolju kontrolu državne granice (akt broj: 01-50-1-1519/19 od 23. 8. 2019)

Asim Sarajlić je u uvodu objasnio da je, na osnovu člana 8. Poslovnika PDPSBiH, poslanik Predrag Kojović Kolegiju PD podnio poslaničku inicijativu kojom se VMBiH obavezuje da uradi analizu propusnosti državne granice BiH i opremljenosti Granične policije za bolju kontrolu državne granice, akt broj: 01-50-1-1519/19 od 23. 8. 2019. Kolegij Predstavničkog

doma je na 8. sjednici, održanoj 10. 9. 2019, odlučio i svojim aktom broj: 01-50-2-13-8/19 od 17. 9. 2019. predmetnu inicijativu dostavio u nadležnost Zajedničkoj komisiji, da je razmotri i dostavi mišljenje PDPSBiH.

Pošto Predrag Kojović nije mogao prisustvovati sjednici, a do otvaranja tačke dnevnog reda nije osigurao prisustvo nekoga od kolega iz PDPSBiH ko bi bio ovlašten da zastupa njegovu poslaničku inicijativu, poslanička inicijativa nije razmatrana.

Ad. 5. Razmatranje Izvještaja o izdatim ispravama i odbijenim zahtjevima za izdavanje isprava za vanjskotrgovinski promet oružja, vojne opreme i robe posebne namjene za 2017. i Izvještaja o realizaciji izdatih isprava za vanjskotrgovinski promet oružja, vojne opreme i robe posebne namjene za 2017. (obrađivač: MVTEOBiH, broj: 01,02-50-18-1623/19 od 12. 9. 2019)

Predsjedavajući Sarajlić je u uvodu naglasio da su na sjednicu, kao ovlašteni predlagači, pozvani predstavnici resornog ministarstva s ciljem da dodatno informiraju o ovoj temi te da daju odgovore na eventualna pitanja. Predložio je da se objedini rasprava o oba izvještaja. Podsjetio je prisutne i na elemente iz Zakona o kontroli vanjskotrgovinskog prometa oružja, vojne opreme i roba posebne namjene ("Sl. glasnik BiH", broj 53/16) gdje je propisana obaveza da Ministarstvo vanjskih poslova i ekonomskih odnosa BiH dostavlja PSBiH izvještaj o izdatim, kao i izvještaj o odbijenim zahtjevima za izdavanje isprava.

Dušanka Majkić naglasila je da se godinama unazad pokušava napraviti red u ovoj oblasti i da je ovo po svojoj strukturi jedan od najzahtjevnijih izvještaja za razmatranje. Propisano je da se svakih šest mjeseci dostavlja izvještaj PSBiH, a rečeno je i da će se uspostaviti poseban sistem koji će voditi ovaj proces što do sada nije urađeno. Ministarstvo se ne trudi da ovaj izvještaj učini upotrebljivim i razgovjetnim za članove Zajedničke komisije.

Dragan Mektić ustvrdio je da nije neuređeno stanje u ovoj oblasti jer tvrdnja i kvalifikacija Dušanke Majkić šteti ugledu i interesima BiH. Nijedan izvozni proces nije urađen bez prethodno dobivene saglasnosti nadležnih ministarstava i agencija, a što je najbitnije, finalna isporuka nije otišla u krive ruke što znaju brojni međunarodni partneri koji prate cijeli proces. Kvalifikacije o neuređenosti nisu dobre, na taj način sami sebi dajemo negativan imidž.

Marina Pendeš bila je izričita da sjednici Zajedničke komisije, kada se raspravlja o ovako značajnim izvještajima, trebaju obavezno prisustvovati ministar ili njegov zamjenik. Insistira na tome i to mora biti praksa u radu Zajedničke komisije.

Zajednička komisija je, s deset glasova „za“ i dva glasa „suzdržan“, usvojila izvještaje.

Ad. 6. Razmatranje Izvještaja o radu parlamentarnog vojnog povjerenika BiH za 2018. godinu (akt broj: 05/3-37-6-227/19 od 28. 1. 2019)

Asim Sarajlić je u uvodnom dijelu naglasio da parlamentarni vojni povjerenik BiH, u skladu s članom 5. stav 1) Zakona o parlamentarnom vojnom povjereniku BiH, 28. 1. 2019, dostavio Parlamentarnoj skupštini BiH svoj Izvještaj o radu za 2018. godinu. Kolegij Predstavničkog doma PSBiH i Kolegij Doma naroda su, kao nadležnu komisiju za izradu mišljenja po ovom izvještaju, odredili Zajedničku komisiju.

Muhamed Smajić, sekretar MO, ukazao je na problem u metodološkom pristupu tokom

pripreme ovog izvještaja. Smatra da pojedinačne pritužbe nisu odraz sistemskog stanja u sektoru odbrane jer 60 pritužbi na deset hiljada ljudi ne mogu biti pravi indikator stanja. Istakao je da postoje problemi koji su povezani s nabavkama pa i logističkim sistemom u cjelini, ali da bi se tu stanje popravilo, potrebno je povećanje budžeta.

Marina Pendeš istakla je da je bitna spona parlamentarnog vojnog povjerenika između Ministarstva odbrane BiH i OSBiH s jedne strane i Zajedničke komisije s druge strane kada je u pitanju ocjena stanja ljudskih prava pripadnika OSBiH. Da bi se unaprijedilo stanje na lokacijama, potreban je novac. Ističe da bi bilo bolje da se metodološki uskladi pristup u sagledavanju stanja u MOBiH i OSBiH. Smatra da Izvještaju za 2018. nedostaje sistemski pristup u smislu prezentiranja stepena provođenja preporuka te je uzela primjer koji je vezan za verifikaciju i nostrifikaciju diploma gdje MOBiH nije nadležno da provodi taj proces. Nadležna su ministarstva obrazovanja u entitetima i kantonima. Postojao je i problem osiguranja profesionalnih vojnih lica tako da je MOBiH potpisalo veliki broj ugovora sa osiguravajućim kućama i u Federaciji BiH i u Republici Srpskoj. Da bi se popravilo stanje na terenu, potrebna su novčana sredstva. Podsjetila je na usvojeni dokument „Pregled odbrane“ iz 2016. Ostvaren je napredak u nabavkama uniformi, hrane i motornih vozila tako da se nada da će izvještaj za 2019. prikazati određeni napredak po pitanjima koja su detektirana kao problem tokom 2018.godine.

Dušanka Majkić naglasila je da samo BiH i SR Njemačka imaju parlamentarnog vojnog povjerenika kao model koji daje mogućnost da se efikasno prati stanje ljudskih prava u oružanim snagama. Alarmantan je broj pritužbi profesionalnih vojnih lica.

Tačno je da za sve treba novac, ali vidljivo je da postoji problem s operativnošću opreme koju koriste vojnici i pripadnici OSBiH u cjelini. Motorna vozila su u prosjeku starija od 30 godina, njihova operativnost je na niskom nivou. Neredovno se servisiraju što svakako otežava izvršenje zadataka. Nedostaju prehrambeni artikli. Zabrinjava odlazak i napuštanje jedinica i OSBiH, tako da samo ako posmatramo stanje kadrovske popunjenosti u 6. pješadijskoj brigadi OSBiH, od 1453 lica, trenutno nedostaje 338. Takvo stanje ugrožava izvršenje misije brigade i profesionalnih radnih zadataka. Nije dobro što se kasni u realizaciji potpisanih ugovora za nabavke potrebnih sredstva. Zabrinjava stanje letjelica jer je time ugrožena bezbjednost letenja. Pita se da li uopće imamo zračne snage jer su samo četiri helikoptera u upotrebi, a nema nijedan radar u operativnoj upotrebi. Zadatak Zajedničke komisije je i da organizira posjete jedinicama i komandama, zajedno s povjerenikom, koji je vrlo bitan partner Zajedničkoj komisiji. Smatra da su i članovi Zajedničke komisije odgovorni za ovakvo stanje.

Marina Pendeš predložila je zaključak: uvažavajući činjenice navedene u Izvještaju parlamentarnog vojnog povjerenika BiH za 2018.godinu, a da se ne bi ubuduće ponavljalo i dešavalo ono što je konstatirano u njemu o operativnosti OSBiH, očekuje da ovaj sastav Zajedničke komisije podrži inicijativu o povećanju budžeta za OSBiH.

Dušanka Majkić ponovila je da smatra da nije sve u novcu. Predviđena su sredstva za hranu i opremu u budžetu. Moramo se pozabaviti i subjektivnom odgovornošću onih koji se bave ključnim resorima u MOBiH.

Boško Šiljegović naglasio je da u svom radu djeluje u dva pravca. To su postupanje po pojedinačnim pritužbama i praćenje stanja ljudskih prava i praćenje sistemskih problema kroz terenske posjete i boravak na lokacijama gdje razgovara s profesionalnim vojnim licima i

obilazi lokacije. Konstatirao je da ima još uvijek bezbroj teškoća jer ga zovu ljudi na lokacije. Nijedan dokument u njegov ured ne dolazi van institucije. Sve dolazi iz sektora odbrane. Prava slika stanja na terenu je takva da ima bezbroj teškoća. Većina je istaknuta i u Izvještaju MOBiH za 2018. godinu. Sugerirao je da se i dalje treba pratiti stanje u sektoru odbrane i da se problemima treba pristupiti ozbiljno i s punom odgovornošću.

Zajednička komisija je jednoglasno, sa 12 glasova „za“, usvojila Izvještaj.

Ad. 7. Razmatranje Izvještaja o radu Odbora za žalbe građana PSBiH za 2018. godinu (akt broj: 05/2-50-12-237/19 od 29. 1. 2019)

Asim Sarajlić je u uvodnom dijelu naglasio da je Odbor za žalbe građana Parlamentarne skupštine BiH, u skladu s članom 15. stav 1) tačka f) i članom 19. stav 1) tačka d) Zakona o nezavisnim i nadzornim tijelima policijske strukture BiH, usvojio Izvještaj o radu ovog tijela za 2018. godinu, te ga dostavio 29. 1. 2019. Parlamentarnoj skupštini BiH na usvajanje. Kolegij Predstavničkog doma PSBiH i Kolegij Doma naroda su kao nadležnu komisiju za izradu mišljenja po ovom izvještaju odredili Zajedničku komisiju. Nije bilo rasprave o Izvještaju.

Zajednička komisija je jednoglasno, sa 12 glasova „za“, usvojila Izvještaj.

Ad. 8. Razmatranje Izvještaja o radu za 2018. godinu (akt broj: 05/1-50-13-26-55-9/19 od 21. 1. 2019) i Plana rada Nezavisnog odbora PSBiH kao nezavisnog tijela policijske strukture BiH za 2019. godinu (akt broj: 05/1-50-13-26-54-9/18 od 21. 1. 2019)

Asim Sarajlić je u uvodnom dijelu naglasio da je Nezavisni odbor Parlamentarne skupštine BiH, u skladu s članom 7. stav 1) tačka e) Zakona o nezavisnim i nadzornim tijelima policijske strukture BiH, usvojio Izvještaj o radu ovog nezavisnog tijela za 2018. godinu, te ga 21.1.2019. dostavio Parlamentarnoj skupštini BiH na razmatranje i usvajanje. Prethodno je Nezavisni odbor, u skladu s članom 7. stav 1) tačka b) Zakona, usvojio svoj Plan rada za 2019. godinu, te je ovaj dokument dostavio 21.1.2019. Kolegiji domova su kao nadležnu komisiju za izradu mišljenja po ovom izvještaju, odnosno Planu rada, odredili Zajedničku komisiju.

Dužanka Majkić je, pozivajući se na dostavljeni izvještaj Nezavisnog odbora, ukazala na problem nacionalne zastupljenosti u policijskim agencijama što, ako se ne izbalansira i ne korigira, može imati štetne posljedice na rad agencija.

Marina Pendeš naglasila je da će članovi Zajedničke komisije imati priliku uvjeriti se u stanje i promjene u radu policijskih agencija tokom rasprave o Izvještaju o radu za 2019.

Enes Obralija objasnio je tok aktivnosti i napore koje je učinio Nezavisni odbor s ciljem da se u policijskim agencijama izbalansira nacionalni sastav policijskih službenika. Istakao je da će Izvještajem o radu za 2019. godinu to biti obuhvaćeno te da će biti vidljivo da su urađene korekcije.

Ljubomir Kuravica potvrdio je navode kolege Obralije te je posebno istakao svoje aktivnosti s ciljem da se izbalansira stanje nacionalne zastupljenosti policijskih službenika u Direkciji za koordinaciju policijskih tijela BiH što će se vidjeti tokom rasprave o Izvještaju o radu za 2019. godinu.

Zajednička komisija je jednoglasno, s 12 glasova „za“, usvojila Izvještaj o radu za 2018. godinu i Plana rada Nezavisnog odbora za 2019. godinu.

Ad. 9. Tekuća pitanja

Predsjedavajući Sarajlić informirao je članove ZK da je Hrvatski sabor uputio Parlamentarnoj skupštini BiH 10. 1. 2020. poziv za učešće u radu Interparlamentarne konferencije o Zajedničkoj vanjskoj i Zajedničkoj sigurnosnoj i odbrambenoj politici koja će biti održana od 2. do 4. 3. 2020. u Zagrebu.

Kolegij PDPSBiH donio je odluku o učešću predstavnika Zajedničke komisije za odbranu i sigurnost BiH, kao i Komisije za vanjske poslove PDPSBiH.

Kolegij DNPSBiH donio je odluku o učešću predstavnika Zajedničke komisije za odbranu i sigurnost BiH. Pošto delegacija PSBiH ima status posmatrača, u skladu s Poslovníkom o radu ove konferencije, mogu učestvovati do četiri predstavnika PSBiH. To znači po dva iz svake komisije.

Predložio je da na ovoj konferenciji učestvuje predsjedavajući Zajedničke komisije i prva zamjenica predsjedavajućeg Zajedničke komisije Borjana Krišto.

Prijedlog je jednoglasno prihvaćen.

Obavijestio je prisutne da će se u drugoj polovini februara održati 4. sjednica, zbog potrebe da se materijali, koji su tokom 2019. stizali u Zajedničku komisiju, razmotre i domovima blagovremeno dostave mišljenja.

Sjednica je završena u 12.45 sati.

Zapisnik sastavio

Željko Grubešić


Predsjedavajući Komisije

Asim Sarajlić


Dostavljeno:

- naslovu
- a/a